

A pensa riba tur detaye den e diseño di renobacion y restauracion di Willem de Zwijger plein

By **Redaccion 36** - April 15, 2014

- Advertisement -

Daphne Every ta splica con



ORANJESTAD(AAN): Daphne Every ta miembro di e ekipo di Monumentenbureau y e diseño di renobacion di Willem de Zwijger Plein, popularmente conoci como Plaza Alameda, ta den su man.

El a splica cua ta e factornan cu un papel importante ora cu a dicidi kico ta worde restaura y kico ta bay introduci na e espacio publico aki cu ta bou construccion y ta keda cla pa mita di aña. Pa loke ta trata e infraestructura y aspecto simbolico di e plasa, tabata hopi importante su ubicacion, esta cu e ta situa dilanti di e edificio, tambe renoba, di Corte di Husticia.

Pa tal motibo inspiracion di su diseño a bin a base di e tres elementonan cu ta representa Husticia, esta e Blinddoek, e Weegschaal y e Spada. Every a splica consecuentemente cu como cu ya tabatin un obelisk riba e Willem de Zwijger plein, a tuma esey pa representa e Spada, pero tambe e parti mey mey di e Weegschaal. Loke ta e Blinddoek, esey ta bin incorpora den e vloer door di un cambio di e color di tegels. Ta bay pone tegels blanco di piedra di coral pa ilustra e paña ey. Otro elemento cu ta representa husticia na nivel mundial ta e 'Lady Justice' of Dama Husticia y esey ta un estatua cu Monumentenbureau a encarga e artista Arubiano Ciro Abath pa traha. Pa dune e toke Arubiano, e base riba cual e ta para, tambe lo ta traha cu piedra di coral.

Pa loke ta trata e restauracion di e plasa, Monumentenbureau naturalmente no por a laga esaki a tras. Daphne Every a indica cu "Durante añanan e plasa a worde cambia y elementonan cu tabatin originalmente no a keda cu excepcion di e obelisk. E plasa original tabata parti den cuater cuadrant, delineando door di pilonetjes cu tabata parce Arubaantjes." Nan ta bay trece e structura ey back door di pone luznan cu ta briya bay ariba y ta crea e efecto di e spirito di un pilon chikito. Na mesun momento, di e manera aki ta ilumina henter e plaza." Esaki no ta e unico fuentenan di luz.

E diseño di e plasa ta conta cu iluminacion den e bankinan pa sinta, mescos cu den e bakinan pa e matanan cu tey y cu ta bay worde planta. Na diferencia di loke tradicionalmente ta usa na plasanan, como por ehempel, lantaarn; aki a scohe pa e iluminacion tin un dobel funcion y brinda tambe un ambiente sigur y agradabel. E trabaonan riba Willem de Zwijger plein a cuminsa na januari y tur cos ta canando bon. Pesey mes ta spera cu e proyecto lo keda cla na tempo y den presupuesto na luna di juni proximo. E ta forma parti di e vision y plan di Gabinete Mike Eman I y II pa renobacion di centro di ciudad. Tambe ta brinda na sociedad Arubiano otro espacio publico cu por disfruta di dje.